

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
OCT 31 1940

6

3150/0332.83

應州續志卷之九

哈佛大學漢和
圖書館珍藏印

應州知州南豐吳炳纂輯

藝文志

制勅
詩餘

詳稟

文

詩

按唐宋元明諸史俱列藝文然祇存其名目以為殫見
洽聞之助若省郡州邑志乘則備載其文所有山川古
蹟政事風俗既可藉文以傳其地亦可因地以存其人
蓋所關綦重矣然牧令之德政碑文人之應酬體連章
累牘臚列志中識者病焉茲惟取實有關係者錄之以
資國史之採擇其他俱從簡汰後之讀是編者不必

歷風土亦可畧窺顛末矣乎次藝文

勅

明

贈江西道監察御史王巍父母勅

勅曰爲人子者孰不欲顯揚其親故子之賢而能宣力效職者朝廷必推恩以報之所以遂其顯親之心而勸天下之爲孝者也爾江西道監察御史王巍故父壽善積於躬慶延於後致有令子效用於時推厥本原宜有褒顯今贈爾爲文林郎江西道監察御史靈其不昧尙克承之

勅曰朕惟人子之才雖本於父而資於母德亦深矣故
存有褒榮歿有追贈此國家之令典也爾楊氏乃江西
道監察御史王巍之母夙有德善是生令子效用於時
而祿養不逮揆其所自宜有顯褒茲特贈爲孺人靈其
歆承永賁幽壤

封江西道監察御史王巍并妻郝氏勅

勅曰朝廷設監察御史欲其振紀綱而勵風俗以弼成
國家之治非得剛方清直之士曷克以稱爾文林郎江
西道監察御史王巍發身儒科典教外邑擢任風紀式

克慎勤是用錫之勅命以示褒榮夫官以察爲名以言
爲職在明大體而畧細故扶植君子而抑小人其益端
爾志堅爾守毋私於法毋撓於勢毋訐以爲直毋苛以
爲能明以燭之公以行之懋脩不懈尙有顯秩以需爾
成欽哉

勅曰朕惟人臣克效勞者雖本於父母蓋亦資伉儷內
助之力也故推恩之典必及之爾江西道監察御史王
巍妻郝氏克謹婦道以相其夫致能盡心於職茲特封
爲孺人服此榮恩永光閭闔

贈禮部尚書石瑁制

制曰禮部古宗伯之職掌天下禮儀祭祀宴享貢舉之政令其任爲至重矣國家稽古建官尤慎斯選必得直亮黃清之士方克稱焉爾故禮部尚書石瑁踐歷中外式著才猷遂遷佐於天官復進陞於宗伯清譽茂著朕用嘉之方期相禮之勤胡不享年之久茲聞哀訃良可悼傷特贈資善大夫禮部尚書誥命用昭寵恩靈爽如存尚其歆服欽哉

贈禮科給事中石瑁父母勅

勅曰國家推恩人臣而必及其親者所以重本而勸孝也是何闕於存沒哉禮科給事中石瑁之父普金慶鍾厥子而祿養不遺揆其所自宜有顯褒今特贈爲徵仕郎禮科給事中靈其不昧尚克承之

勅曰朕惟羣臣之才者固本於父亦必資母德焉存有褒榮歿有追贈此有國之通制也禮科給事中石瑁之母王氏有子能官而不逮養溯惟所自宜有褒榮茲特贈爲孺人尚克承之永賁幽壤

勅曰朕惟人之繼母寔配體於父而於子有教育之德

焉故人臣之克勤於職者其繼母亦有褒榮之命禮科
給事中石瑁之繼母曲氏有子效用歷年於今推厥慶
源宜隆褒錫是用贈爾爲孺人靈其承之永賁泉壤

封禮科給事中石瑁并妻郭氏勅

勅曰國家設六科給事中所以平奏術詳命令審覆是
非駁正違失其責重且要矣匪得其人曷膺是選爾禮
科給事中石瑁發身賢科給事廷階歷年滋久克慎且
勤是用進爾階徵仕郎錫之勅命以爲爾榮夫居近侍
而以言爲職貴達大體而畧細故爾其益端乃心勵乃

行母徇母激懋於厥官尙有榮名需爾後效欽哉

勅曰夫婦人之大倫故朝廷推恩羣臣命必及之禮科
給事中石瑁之妻郭氏克相其夫茲特封爲孺人祇服
榮恩永光閨闈

贈封中軍都督府經歷司都事石震父母勅

勅曰教子者必使勞於所事勸臣者必使顯其所生此
固人之至情而亦國之良法爾石居敬乃南京中軍都
督府經歷司都事震之父林泉晦跡書史傳家竟成教
子之功宜示推恩之典茲特贈爾爲文林郎南京中軍

都督府經歷司都事服此隆恩永光幽漠

勅曰人臣有勞於國朝廷必寵其親所以體報德之心示勸功之典爾蘇氏乃南京中軍都督府經歷司都事石震之母相夫盡職教子成名揆厥慶源宜申恩典茲特封爲太孺人佩此榮光永綏色養

封中軍都督府經歷司都事石震并妻陳氏勅

勅曰國家分督府以領五軍雖專武秩置幕官以治庶務則用文資寓意實深任人宜慎爾南京中軍都督府經歷司都事石震發跡賢關佐官闈幕歷年漸久奉職

惟勤茲特進階文林郎錫之勅命夫官不計崇卑必求其稱事不論難易務底於成勉圖進脩以俟甄擢欽此勅曰夫婦之際風化所先君臣之閒恩禮攸在凡爲伉儷必與褒封南京中軍都督府經歷司都事石震妻陳氏早聞內則克相厥家夫既有官秩宜偕貴茲特封爲孺人榮命聿頒式光闈闈

贈封上林苑監左監丞田天澤父母勅

勅曰旌獎賢勞乃朝廷之著典顯揚親德亦人子之至情此倫理所當崇實風教所由繫肆推恩命奚閒幽明

爾田盛乃上林苑監左監丞天澤之父存心篤厚待物
寬平賢聲素著於鄉閭德惠每施於族黨顧遺經之訓
素嚴乎義方致令子之才早登於鄉薦績書奏最名著
銓曹禮典推恩光生泉壤褒寵有自昭示無窮茲特贈
為文林郎上林苑監左監丞尚期神爽之昭益迓寵靈
之賁

勅曰母氏劬勞義實兼乎教育朝廷寵數禮特重於褒
榮肆緣報本之情誕舉貤封之典亦惟有德始稱厥名
爾陳氏乃上林苑監左監丞田天澤之母性本淳良行

惟勤儉相夫治內久著賢聲教子居官聿成嘉績康強
無恙方膺祿養之榮光顯惟新宜示褒嘉之寵用彰慈
範兼勵賢能茲特封為太孺人諒天道之足徵庶家規
之永賴

封上林苑左監丞田天澤并贈妻王氏勅

勅曰上林苑監典樹藝牧養之政所以省民財而供國
用也必設正丞掌理其事匪得賢能之士曷克稱焉爾
上林苑監左監丞田天澤早掇鄉科首司民社久殫勞
勩遂擢今官興利除姦才實優於幹濟正身率屬心恆

篤於操脩考最既書寵褒宜示茲特進爾階文林郎錫之勅命於戲居官以盡職爲良已徵嘉績褒譽以永終爲善勿替初心尙有崇階以需來效欽哉

勅曰人臣有勞於國朝廷必寵其家肆惟伉儷之良均被褒封之命典章具在存歿攸同上林苑監左監丞田天澤妻王氏淑慎有常祇勤靡忒出自名族歸於儒門禮美相成方著宜家之美琴瑟中斷竟違偕老之心宜媿夫階以申卹命茲特贈爲孺人庶淑靈之有知服休光於無斃

封贈兵部職方司主事霍希夔父母勅

勅曰樹德砥行之士不自顯試而啓迺哲肩以光國家其貽穀亦勤矣卽以子之貴貴之詎非宜哉爾霍宗嶽乃兵部職方清吏司主事希夔之父勤儉持家朴茂成性善信素推於鄉族義方尤篤於家庭惟予望郎寔爾良嗣嘉其燕翼錫之寵章是用封爾爲承德郎兵部職方清吏司主事迺恩光之有赫綏壽祉以無疆

勅曰世常言慈母而易並稱嚴君貴其能訓也故劬勞之恩義方之訓均宜有隆報焉爾王氏乃兵部職方清

吏司主事霍希夔之母食貧雅操引禮自持篤生賢嗣
愛而能教祿養弗永淑問如存是用贈爾爲安人式表
徽音永光幽宅

封兵部主事霍希夔并贈妻王氏封妻李氏勅

勅曰尚書郎高選也朕初闕服咸有寵數以褒嘉之矧
職方列屬夏官務劇而任重敘材程績褒賚奚可後哉
爾兵部職方清吏司主事霍希夔蔚有士望發於制科
以爾通達治才曉暢戎務掄之夏省俾業厥官而克殫
忠勤數紆籌畫官評允暢惟朕爾嘉茲以覃恩特授爾
階承德郎錫之勅命爾馳驅王事竟以隕軀朕篤不忘
是有褒賚爾尚歆予之寵貺哉

勅曰士有媿德之配而不與其顯榮此人情所憫惻
也朕有大慶以寵羣臣肆褒卹之典得並及焉爾兵部
職方清吏司主事霍希夔妻王氏德秉靜嘉儀脩順正
嬪於喆士佐內有聞爾夫登庸爾則永逝良可閔己是
用贈爾爲安人沒也有知承此異渥

勅曰朕敷大慶於廷臣必推恩於厥配所以酬服采之
績章敬助之賢也爾兵部職方清吏司主事霍希夔繼

室李氏懋踐閨儀恪脩內政相爾夫子克勤其官茲渙國恩宜從夫爵是用封爾爲安人茂膺並命之榮式表相成之德

贈陝西西安府華州蒲城縣知縣田蕙父母勅

勅曰士有藏器而未試於時子有沾祿而弗逮其父於人情亦甚戚矣所以慰先志而展孝思者惟國典是賴也爾貢士田維魯乃陝西西安府華州蒲城縣知縣蕙之父飛英豐序通籍南宮操履無虧義方有訓爾子允宗暢譽雅志可酬已是用贈爾爲文林郎陝西西安府華州蒲城縣知縣綸綍有輝泉臺永賁

勅曰母氏劬勞幸哉有子而身不獲視其成食其報此人子所爲痛風木也不有榮恩何以慰之爾俞氏乃陝西西安府華州蒲城縣知縣田蕙之母允廼閨彝克脩孝德相夫訓子蔚有名稱祿食弗沾良可憫惻茲特贈爾爲孺人欽承明命永耀幽原

封陝西蒲城縣知縣田蕙并贈妻秦氏封妻陳氏

勅

勅曰朕加意元元思登至理所賴承宣德意朝令夕達

者惟良邑宰耳厥有政績褒典庸可後哉爾陝西西安府華州蒲城縣知縣田蕙性質端方才猷敏練發身甲第試宰名封乃能廉慎自持慈祥敷政民懷訟理綽有令聲茲以考績授爾階文林郎錫之勅命夫程功晉秩國有彝章爾尚益殫初忱懋圖來效庶永終譽以光訓詞欽哉

勅曰士旣貴而篤念於始配爲其共處約也肆國家從爵之典必首及之爾陝西西安府華州蒲城縣知縣妻秦氏毓秀儒門于歸令族敬相夫子力學入官榮遇方

新嗟爾先逝是用贈爾爲孺人懿靈不爽顯命歆承

勅曰朕觀風化始於閨門業官賴於內助則知伉儷之義無先後一也爾陝西西安府華州蒲城縣知縣田蕙繼室陳氏女誠夙嫻婦彝允迪前徽是紹以襄爾夫宰邑著聲資爾敬戒是用封爾爲孺人祇服褒綸益敦敬順

贈戶部四川司主事田蕙父母勅

勅曰朕惟樹穀者資其食樹德者享其報故士有積學龐德不顯其身者必濬發於厥嗣此天道也爾贈文林

郎陝西西安府華州蒲城縣知縣田維魯乃戶部四川
清吏司主事蕙之父譽振校宮名升天府偉抱阻逢於
當世遺經有託於後人能舉劇部之官滂爾嚴庭之訓
茲加贈爾爲承德郎戶部四川清吏司主事祇歆游至
之榮益篤方來之祐

勅日子之於母生有陟屺之思歿有柩椁之感念至切
也朝廷敷慶追崇雖亡必逮焉爾贈孺人俞氏乃戶部
四川清吏司田蕙之母旣孝而慈終溫且惠相夫綴學
綽著才名昺子服官弗躬祿養母儀雖邈令範攸存茲
加贈爾爲安人霞章之被維新風木之悲庶慰

封戶部主事田蕙并贈妻秦氏封妻陳氏勅

勅曰地官之屬分理天下征貢以經制國用登阜民財
匪直掌度支會計已也任旣重煩必資詰彥爾戶部四
川清吏司主事田蕙性資閑朗才諳敏明射策大廷分
符鉅邑乃簡置計曹而能劑量有經出納惟允使公私
兩利於國計深有裨焉茲以覃恩授爾階承德郎錫之
勅命夫緩譏則病國急聚則病民爾旣導利以布上下
矣尙殫心畢計以永終譽而樹來效欽哉

勅曰賢婦克相其夫由學登仕乃中道仳離則人情有深隱矣介此鴻休豈靳追錫爾戶部四川清吏司主事田蕙妻秦氏望族含貞哲人作配方資敬助遽爾長捐宜錫新綸用旌舊勩茲加贈爾爲安人歆承赫奕之綸永表徽柔之德

勅曰士行之襄恆資女德故夫貴於朝則妻榮於室以明相敵之義嘉交儆之功也爾戶部四川清吏司主事田蕙繼室封孺人陳氏順正無違柔嘉維則克脩內政恪贊官常爾夫振譽郎曹允茲裨益茲加封爾爲安人

光膺綸綍之恩彌慎珩璜之節

贈通政使司左叅議田蕙父母制

制曰夫天之道猶酌也不足則注之故士有抱儒終老樞牖之閒而其子卒用儒顯揚名朝廷斯其所托弘遠矣爾累贈承德郎戶部四川清吏司主事田維魯乃通政使司左叅議蕙之父績學綴文履繩約矩升名貢籍弗沾一命之榮振緒遺經早與九卿之議天道不僭儒效甚明是用加贈爾爲奉政大夫通政使司左叅議五鼎歆榮重泉耀采

制曰子欲養而親不待故執器列鼎則悲朝廷錫類推
恩重褒累卹教人孝也爾累贈安人俞氏乃通政使司
左叅議田蕙之母操家有法秉禮不愆爰相良人勗成
哲嗣祿雖弗逮訓乃益光是用加贈爲宜人載歆有赫
之章用慰如存之感

封通政使司左叅議田蕙并贈妻秦氏封妻陳氏

制

制曰朕臨朝親決事惟是納言之臣得關天下章奏以
通治道而來諫者此其職重矣自匪茂異弗以叅焉爾

通政使司左叅議田蕙偉器宏才穎資敏識登名宰邑
清勤績著秦中主計權關廉惠聲流吳下選繇金部叅
在銀臺而爾敷對詳明承傳慎密式孚羣望允愜朕心
屬茲最聞特授爾階奉政大夫錫之誥命夫虞周之盛
也上命出納惟龍惟山甫實司之故訓嚴夙夜而頌歸
喉舌世以極治爾奉職效矣益茲益明以副朕望忠咨
瘼之意欽哉

制曰夫易稱中饋詩詠舊婚此以知婦職代終而人倫
重始矣肆推經誼爰載國彝爾通政使司左叅議田蕙

使司通政使田蕙之祖母德全孝敬行備儉勤順正宜家克襄廉吏詒謀啓後爰得亢宗昌延再世之祖宜霈初階之命是用贈爾爲淑人歆承新渥永芘來昆

贈通政使司通政使田蕙父母制

制曰士有強學砥行抱義甚高乃經術不售於身而儒效竟徵於子觀所顯樹能忘式穀之自哉爾歲貢累贈奉政大夫田維魯乃通政使司通政使蕙之父學窮今古而孝友早聞名振膠庠而謙讓見譽雖里選之已及乃仕籍之未登爰啓嗣賢爲時名碩是用加贈爾爲通議大夫通政使司通政使申錫絲綸之寵茂增堂構之光

制曰人臣念母氏之勞而不逮養位愈崇則其慕愈切匪藉國恩胡以慰其私而示勸哉爾累贈宜人俞氏乃通政使司通政使田蕙之母內範莊嚴闡德孝敬閨中勸學夙聞環珮之規膝下授經尙守機絲之教勛成令子洵陟高華睠惟慈訓之光宜晉褒綸之卹是用加贈爾爲淑人歆承國寵永作閨彝

封通政使司通政使田蕙并贈妻秦氏封妻陳氏

制

制曰朕惟國家大政必使上下流通然後無底滯壅蔽之患惟是出入王命宣下情而達上德則惟納言之臣是賴焉爾通政使司通政使田蕙才識通宏性資樸茂自掄制策屢著聲華邑宰宣猷雅多廉平之譽農曹司計夙弘綜理之能爰自郎闈晉叅喉舌更歷左右俾掌銀臺爾乃愈勵恭勤克慎出納凡百司之章牘辯覈必嚴與羣情之隱憂敷奏惟允勞望日積褒敘宜隆是用授爾階通議大夫錫之誥命夫人主周視廣覽所以爲明也兼聽邇察所以爲聰也今四方利病或不以時聞民情或壅而不達豈朕所望於納言之意乎爾旣祇承厥敘尙愈加茂愬用贊朕明日達聰之治惟爾亦永有休問欽哉

制曰夫婦人倫之始禮稱從爵故或德茂相成而願違偕老則朝廷錫命之典必均及焉爾通政使司通政使田蕙妻累贈宜人秦氏淑慎爲儀慈柔賦性含辛茹苦以佐朝夕之供織紉繰絲以贊燈窓之業雖嘗勵雞鳴之儆戒而未承翟茀之光華茲用加贈爾爲淑人異渥

洛膺幽原永耀

制曰易稱中饋詩詠宜家言女德有裨於士行也國家
疏榮錫命豈以先後閒哉爾通政使司通政使田蕙繼
妻累封宜人陳氏夙嫻母訓克嗣前徽不忘荆布之風
允踐蘋藻之職令儀既備明綍宜申是用加封爾為淑
人祇承冠帔之華愈慎珩璜之度

封山東道監察御史陸厚父母勅

勅曰朕視羣臣之任職者必推恩於所生所以嘉勞而
勸孝也山東道監察御史陸厚父賢克成其子效用於
朝茲特封爾為文林郎山東道監察御史服此榮恩益
懋祇慎

勅曰國家制推恩之典以寵任事之臣其能盡心於職
務者則必榮及其親所以示嘉褒而勵忠孝也爾山東
道監察御史陸厚之母熊氏有子致用歷年於今皆爾
善德所致茲特封為孺人服此隆恩尚懋敬之

封山東道監察御史陸厚并贈妻王氏勅

勅曰朝廷設監察御史欲其振紀綱而勵風俗以弼成
國家之治非得剛方清直之士曷克以稱爾文林郎山

東道監察御史陸厚發身賢科擢司風紀詳慎勤敏用
舉厥官是用錫之勅命以示褒榮夫官以察爲名以言
爲職在明大體而畧細故扶植君子而抑小人其益端
爾志堅爾守毋私於法毋撓於勢毋訐以爲直毋苛以
爲能明以燭之公以行之懋脩不懈尙有顯秩以需爾
效

勅曰朕於任職之臣旣推恩於其親而又榮及其配者
所以明國典而厚人倫也爾山東道監察御史陸厚故
妻王氏夙謹婦道用相其夫旣已早歿茲特贈爲孀人
服此榮恩永光幽窆

勅曰朕惟人臣克效勞於國者雖本於父母蓋亦有伉
儷內助之力也故推恩之典必及之爾山東道監察御
史陸厚繼室李氏克謹婦道以相其夫致能盡心於所
職茲特封爾爲孀人服此榮恩永光閨闈欽哉

國朝

諭祭誥封夫人鮑敬母張氏勅

康熙十九年

勅曰朝廷弘錫類之恩典均存歿臣子著靖共之節榮
被親闈爾張氏乃山西大同總兵官鮑敬之母爾子歷

任有年勤勞厥職克承家訓宜賁彝章諭祭特頒以光
泉壤爾靈不昧其欽承之

諭祭鑾儀衛鑾儀使鮑敬勅 康熙三十五年

勅曰鞠躬盡瘁臣子之芳踪卹死報勤國家之盛典爾
鮑敬性行純良才能稱職方冀遐齡忽聞長逝朕用悼
焉特頒祭葬以慰幽魂嗚呼寵錫重壚庶沐匪躬之報
名垂信史聿昭不朽之榮爾如有知尚克歆享

賜贈屯留縣教諭馬克述父馬瓚并母 賀孫氏制

雍正十三年九月

制曰任事需才稱職志在官之美馳驅奏效報功膺錫
類之仁爾邑庠廩生馬瓚乃山西潞安府屯留縣教諭
馬克述之父詩書貽謀義方著範弓冶克勤於庭訓箕
裘丕裕夫家聲茲以覃恩賜贈爾為修職郎錫之勅命
於戲肇顯揚之盛事國典非私酬燕翼之深情臣心彌
勵

制曰奉職無愆懋著當官之績致身有自宜酬令母之
恩爾山西潞安府屯留縣教諭馬克述之前母孫氏淑
範載揚徽音克嗣溫恭著美於蚤歲慈惠貽休於後人

茲以覃恩馳贈爲八品孺人於戲賁象服之端嚴誕膺
鉅典錫龍章之渙汗永播德音

制曰佐庶司之經理受獎通才勸百爾之孝思用彰慈
教爾山西潞安府屯留縣教諭馬克述之前母賀氏德
可型家恩能裕後慈範式昭於厥嗣榮光宜及於乃躬
茲以覃恩馳贈爲八品孺人於戲師賢母之風勵茲清
白沛熙朝之命垂此德音

制曰羣工師濟旣懋績之克昭母氏劬勞渙明綸而宜
逮爾山西潞安府屯留縣教諭馬克述之母郭氏婦德
克諧母儀丕著挽鹿嫺宜家之訓和熊預賓國之才茲
以覃恩馳贈爾爲八品孺人於戲加闈內之殊榮用酬
願復沐天家之曠典永賁幽潛

馳贈平遙縣訓導鄭宗姬父鄭彙并母劉氏制

雍正十三
年九月

制曰設官分職昭器使之無遺錫類施仁嘉蒙恩於伊
始爾鄭彙乃山西汾州府平遙縣訓導鄭宗姬之父秉
心醇樸飭行端方教誨懷式穀之勤政事本貽謀之善
茲以覃恩馳贈爾爲修職郎山西汾州府平遙縣訓導

錫之勅命於戲一命得以逮親遂膺曠典庶政期於稱職永荷榮光

制曰登皇路以馳驅忠原本孝入庭闈而侍奉嚴必兼慈爾山西汾州府平遙縣訓導鄭宗姬之母劉氏性本和柔飭衿鞶於閭內教惟勤慎紆章服於庭前茲以覃恩馳贈爾爲八品孺人於戲所親邀優渥之恩勉圖懋績有子効靖共之誼永表芳型

馳贈興縣教諭張鶴齡父張灝并贈母嚴氏封母

談氏制 乾隆十六年十一月

制曰任使需才稱職志在官之美馳驅奏効報功膺錫類之仁爾張灝乃山西太原府興縣教諭張鶴齡之父雅尚素風長迎善氣弓冶克勤於庭訓箕裘不裕夫家聲茲以覃恩馳贈爾爲修職郎錫之勅命於戲肇顯揚之盛事國典非私酬燕翼之深情臣心彌勵

制曰劬勩奏績膺寵命於朝廷渙汗敷恩闡幽光於母氏爾山西太原府興縣教諭張鶴齡之母嚴氏懿儀不忒慈範彌昭諧早歲之倡隨啓後人之昌大茲以覃恩馳贈爾爲八品孺人於戲播芳型於彤管有命自天賁

嘉寵於黃墟永綏厥祚

制曰奉職無愆懋著勤勞之績致身有自宜酌鞠育之恩爾山西太原府興縣教諭張鶴齡之母談氏淑範宜家令儀昌後早相夫而教子俾移孝以作忠茲以覃恩馳封爾爲八品孺人於戲賁象服之端嚴誕膺鉅典錫龍章之渙汗用表榮施

賜贈山東臨淄縣知縣張鶴齡祖父張缺鏐并祖

母王氏制乾隆二十六年十一月

制曰考績報循良之最用獎臣勞推恩溯積累之遺載

揚祖澤爾張缺鏐乃山東青州府臨淄縣知縣張鶴齡之祖父錫光有慶樹德務滋嗣清白之芳聲澤流再世衍弓裘之令緒祐篤一堂茲以覃恩馳贈爾爲文林郎錫之勅命於戲聿修念祖膺茂典而益勵新猷有穀貽謀發幽光而不彰潛德

制曰册府酬庸聿著人臣懋績德門輯慶式昭大母芳徽爾王氏乃山東青州府臨淄縣知縣張鶴齡之祖母箴誠揚芬珩璜表德職勤內助宜家久著其賢聲澤裕後昆錫類式承乎嘉命茲以覃恩馳贈爾爲孺人於戲

播徽音於彤管壺範彌光膺異數於紫泥天府永邵
 制曰嘉績聿隆於報最奕世蒙庥慈徽載著於馳封重
 闡集慶爾韓氏乃山東青州府臨淄縣知縣張鶴齡之
 繼祖母珩瑀傳芳蘋蘩濟美溯貽謀於闔則繼美益彰
 弘錫類於朝章推恩並厚茲以覃恩馳贈爾為孺人於
 戲鸞書賁彩普昭一體之榮施馬鬣揚休永表重泉之
 遺澤

贈山東臨淄縣知縣張鶴齡父張灝并母嚴氏制

乾隆二十六年十一月

制曰求治在親民之吏端重循良教忠勵資敬之忱幸
 隆褒獎爾張灝乃山東青州府臨淄縣知縣張鶴齡之
 父禔躬淳厚垂訓端嚴業可開先式穀乃宣猷之本澤
 堪啓後貽謀裕作牧之方茲以覃恩贈爾為文林郎錫
 之勅命於戲克承清白之風嘉茲報政用慰顯揚之志
 昭乃遺模

制曰錫類揚休恩不殊於中外循陔追慕情無閒於後
 先爾嚴氏乃山東青州府臨淄縣知縣張鶴齡之前母
 家風肅穆內則嫻明瑀珩猶存睠芳型之未遠梧捲如

原州紀志 卷九
故欣鉅典之方膺茲以覃恩贈爾爲孺人於戲圖史有
聞欲報寸心於宿草彝章不煥用弘厚澤於新綸

制曰朝廷重民社之司功推循吏臣子凜冰淵之操教
本慈幃爾談氏乃山東青州府臨淄縣知縣張鶴齡之
母淑慎其儀柔嘉維則宣訓詞於朝夕不忘育子之勤
集慶澤於門閭式被自天之寵茲以覃恩贈爾爲孺人
於戲仰酬顧復之恩勉思撫字載煥絲綸之色永賁幽
潛

馳贈太原縣教諭王爾遠父并母霍氏制

乾隆二十六年十一月

制曰任使需才稱職志在官之 馳驅奏效報功膺錫
類之仁爾生員王知乃山西太原府太原縣教諭王爾
遠之父雅尚素風長迎善氣弓冶克勤於庭訓箕裘不
裕夫家聲茲以覃恩馳贈爾爲修職郎山西太原府太
原縣教諭錫之勅命於戲肇顯揚之盛事國典非私酬
燕翼之深情臣心彌勵

制曰奉職無愆懋著勤勞之績致身有自宜酬鞠育之
恩爾霍氏乃山西太原府太原縣教諭王爾遠之母淑

範宜家令儀昌後早相夫而教子俾移孝以作忠茲以覃恩賜贈爾爲八品孺人於戲賁象服之端嚴誕膺鉅典錫龍章之渙汗永播徽音

賜贈孝義縣訓導王製父王永泰并母席氏制

乾隆二十六年十一月

年十一月

制曰任使需才稱職志在官之美馳驅奏效報功膺錫類之仁爾王永泰乃山西汾州府孝義縣訓導王製之父雅尚素風長迎善氣弓冶克勤於庭訓箕裘丕裕夫家聲茲以覃恩賜贈爾爲修職佐郎山西汾州府孝義縣訓導錫之勅命於戲肇顯揚之盛事國典非私酬燕翼之深情臣心彌勵

制曰奉職無愆懋著勤勞之績致身有自宜酬鞠育之恩爾席氏乃山西汾州府孝義縣訓導王製之母淑範宜家令儀昌後早相夫而教子俾移孝以作忠茲以覃恩賜贈爾爲八品孺人於戲賁象服之端嚴誕膺鉅典錫龍章之渙汗永播徽音

詳文

請西山添設巡檢詳文

國朝署
知州 雷 暢 井研人

為請設巡檢以靖地方以清 國課事竊惟卑州地處

關外界連本府之大同懷仁渾源山陰并代州之繁峙

寧武府之寧武及朔平府之朔州平魯左雲右玉等州

縣接壤交錯最易藏奸而去州寫遠逼近口外最難稽

查者尤莫如安東一衛衛中又有西山一帶二十二村

隔越高山大河離朔州平魯左雲右玉山陰等州縣近

自五六十里遠至八九十里不等而離卑州近自一百

二十里遠至一百八九十里不等且深山邃谷羊腸鳥
道土著稀少流寓不常地多逃絕糧多逋欠由來已久
非一日矣職查向來設有衛官專司稽查尙難保無奸
匪之潛藏與錢糧之逋欠繼後歸併入州印官有刑名
錢穀之事勢難時時親歷捕官有巡緝之責不能久羈
深山弭盜止憑保甲催糧惟藉里差實因鞭長莫及遂
至凋敝日深且查閱舊糧州額之民欠十分之三衛額
之民欠十分之七糧少而欠多日積而月甚職催科乏
術已於飭行查議積欠等事詳請轉詳在案再四思維

莫若懇請添設巡檢壹員駐劄備地附近西山等村適
中之地備司巡緝兼清地土以資彈壓令其就近稽查
保甲丈勘逃地着落承糧申詳卑州註冊以憑不時親
查併請給以銀柜印串封條就近徵收折色申詳卑州
轉請拆解其本色米豆草束俱令催督赴州交納至於
刑名等事槩不准理庶匪類不致潛藏課賦易於催辦
下吏得藉臂指之力而小民兼省跋涉之苦其於國
計生民均有裨益職身任地方已經一載籌畫利弊莫
此爲最是以不揣冒昧謬陳一得懇乞憲臺鴻裁酌核

題達則感沐高深直與河嶽同其流峙矣

稟帖

覆蘇大中丞通飭校輯誌書稟

國朝知州

吳

南豐人

乾隆三十三年七月十七日接奉本府札開乾隆三十三年七月十三日蒙布政司憲札內開頃奉大人面諭以山陰平魯等縣所呈誌書尚係明季時校輯其中記載語句甚多紕繆不經不倫大屬不合等因飭將卑州誌書是否尚係前明時考訂其誌內紀載有無不倫不經紕繆語句速即詳查明確分別刪改校輯呈請察核仍將接到札飭查明緣由先行稟奪等因到州奉此遵

查卑州誌書係雍正四年前牧蕭綱纂輯並非前明時
考訂其誌內紀載亦無不倫不經悖謬語句似可毋庸
分別刪改但自雍正四年迄今四十餘載一切因革損
益之事不知凡幾若不急為採擇年復一年凡境內應
登紀載事蹟必致湮沒無稽容俟職辦公之暇或集高
年紳士諮訪考證或搜故老遺編正訛補缺務期續載
成帙呈請察核外所有接到札飭查明緣由合先稟聞
伏祈崇鑒

覆蘇大中丞通飭興修農田水利等事宜稟

知州 吳 炳

乾隆三十三年七月二十七日接奉本府信票轉蒙大
人憲牌通飭興舉農田水利修理道路津梁以益民生
以便行旅頒發水利事宜十二條勉諸有司以職分當
爲之事共期爲千百世不可泯之人慎勿視爲泛常虛
應故事如有因地制宜之策相時度勢之方各抒所見
繪圖貼說據實稟聞以憑分派賢員往勘倘稍有粉飾
怠忽并滋生事端者定卽按照溺職例嚴叅不貸等因

蒙此職細尋繹仰見大人注念國計民生苦心婆心指陳痛切地方有司苟非木石能不悚惶職現司應牧謹當就應言應謬抒蠡管之見恭候察核伏查三代井田之制方里畫井開溝四尺十里爲成開洫八尺百里爲同開澮二尋蓋捐膏腴之地損賦稅之入以治溝洫自四尺以迄二尋故能時其蓄洩以備水旱自秦開阡陌廢井田任民佔耕溝洫之制遂以大壞兩漢代興司國計者留心民瘼知井田難復乃因山澤之利引水灌田創爲水利之說以代溝洫開澮之制唐宋以來代有訐謨其大要不外興水利除水害二策興水利者先期瀦蓄遇旱澆灌恆賜不致成災除水害者開濬水槽預備宣洩霖霖不虞漲溢二者似屬分途而其實水槽深通潦可免浸漫者旱卽可免焦枯是除害卽所以興利二者殊途而同歸也應州東西北三面地俱平坦惟南面層巒疊嶂地勢更高東有渾河發源渾源州之神頭村由州屬寺家莊入境經安樂營過南柳會等村計行州境六十二里至大同縣之小長城出境西有桑乾河發源馬邑縣之洪濤山過山陰地方由州屬梁亭村入境

經北賈寨過屯兒莊等村計行州境四十七里至大同縣之小村兒出境職親加跣驗渾河兩岸田地俱較河身高三四五六尺不等桑乾河兩岸田地俱較河身高四五尺至八九尺不等此二河者雨缺則細流如帶不能上引入地連雨則驚濤急漲閒或漫溢兩岸或倒灌小溪然亦隨漲隨落不崇朝而歸槽安貼伏讀鈞論云地高不可爲渠鮮有收河之利者正此類也南路靠山一帶山脚下胡峪馬蘭峙峪大山門小山門茹越小石大石北婁等口俱有泉水流出時當無雨亦甚旺近山村莊各築壩阻水澆田離口稍遠者槩不得霑其利一遇大雨時行地嫌水多卽拆壩放水以鄰爲壑下游咸受其害水少則爭之不來水溢則推之不去總由向來未開官渠聽民各自逐段踞佔以致渠不貫通水無歸宿水縮之時尙有近山數村得專壩水之利而北面村莊少雨則受旱乾之害連雨則受淹浸之害及今不治年復一年不止爲患田廬勢必致商旅阻滯驛遞稽延誠不可不亟爲籌算也職遍歷諸口逐細跟查詢問紳士耆民有舊渠湮沒者如大石口一水經過張家寨

城下莊等村向有舊渠今復佔種禾稼阻塞水道應循照故址開挖深通也有舊渠短窄者如胡峪口一水除下曠望岩二村有渠外下流大西頭以北卽散漫無歸常虞漲溢今應接連挑濬也有應徑入桑渾二大河者如北婁大石之可以直趨渾河茹越小石胡峪之可以直趨桑乾是也有應由小溪折入大河者如峙峪山門馬蘭等水俱可由鹽河入桑乾是也各水情形不一均宜官爲經理再搜查歷年分水塵案有一日中按時分灌點香爲度如北婁等村之分用北婁口水是也有一月中按日四六分灌周而復始如南曹山上乾港之分用茹越口水是也有數年中按年分灌周而復始如南曹山上下乾港之分別二年三年輪用峙峪口小山門等水是也蓋由山口水泉微細村落繁多勢難遍漑向只近口數村自立渠壩專利已久均有歷任府州斷案存據此時官爲接連開渠引入大河將來卽遇連雨漲發各自安流不致溢出爲害並請飭近渠村莊除前經官斷原有舊壩外其餘只許自開支渠引灌不許水少則築壩阻攔水多又拆壩決放貽禍鄰村其渠道所佔

地畝或於合村公地內撥補或遵照奉頒條款勸令得
資灌溉之各地主派量畝分照所毀數目補償如肯情
愿捐輸依例申請旌獎所需人工飯食酌擬勸諭田主
派費佃戶幫工但目下收穫事忙未暇集議請俟九月
農隙後職單騎減從親詣渠道經行處所相度地勢面
同紳衿父老從長商妥辦理仍俟事竣後造冊申報各
衙門備案每年於四月農隙時挑濬一次定爲善後章
程永遠遵行至開井泉挖塘浦等事皆所以備旱潦詢
問土著居民雖據僉稱州境南路地高掘三四丈至八
九丈不等方可及泉底土虛鬆必須磚砌每井一圓須
工本錢約十千上下只可灌地五六畝費多利微北路
地勢畧低見泉稍易又因地多鹽鹹水味苦鹹澆地反
損田苗是以開井甚少塘浦須結實地土方可瀦水應
州沙地十之七八泥土俗稱膠地不過十之二三膠地
價貴留種田禾不肯刨挖塘浦沙地脈疎滲漏水難停
蓄所以向未開塘等情職跣看水渠之便隨復測量井
水南路近城村莊亦有開二三丈卽見泉者北路不近
河村莊亦儘有水不苦鹹者總之愚民因循怠惰難與

更新現辦開渠工程容俟開畢後勸諭確驗井眼淺深
核算本利多寡再行次第興舉境內渾河所過路徑僻
左未設橋梁桑乾河係通山陰懷仁大同等處大道公
文行旅絡繹不絕舊有白堂子木橋一座冬春水落搭
蓋夏秋水漲拆撤職常於拆橋後或委吏目或遣親信
家丁赴白堂馬頭密查遇有水夫刁難勒索等弊卽嚴
拿枷號示懲惟查河路修長只白堂橋一座未免民仍
病涉復於上年春閱勸諭白堂子西二十里之曹張子
等村居民添建木橋一座以便往來卑州北至懷仁縣

交界舊站舖三十五里西北至懷仁交界清水河四十
里西至山陰縣交界李莊三十五里東至渾源州交界
羅家莊四十里南至繁峙縣交界茹越堡四十里道路
俱屬寬平並無坡坂惟兩旁有尚未開溝之處亦請俟
渠工辦畢於明歲開凍時晒看墊修再通衢種樹枝葉
垂蔭行人根芟藉固地脈誠爲有益卑州東西南北五
處大路通計有舊存老樹八十五株職到任後於上年
會種一千株本年續種三百五十株現共成活二百零
一株統俟明歲清明前再行補種造報緣蒙諄諭謹先

查明境內河道情形相度水渠地勢繪圖貼說縷細稟
聞恭請訓示統祈崇鑒

請委員暫署吏目事務并報明續開渾河渠道通

稟

知州 吳炳

前蒙飭發興修農田水利經理橋道樹株事宜十二條
業經職逐細查明繪圖貼說稟覆並請俟九月農隙後
舉行在案茲屆碾場事畢之候據渠道經行村莊各報
動工日期均於九月初九十一十八等日撥夫開濬此
時天氣融和約至十月下旬可以陸續告竣伏查卑州
大渠支渠統計近二十條從水口歸入大河自二三十
里至五六十里不等各村莊人心不一情偽多端有寔

心感頌憲恩踴躍辦理者亦有不圖永遠利益只吝目下小費觀望支延者有因佔損糧地或兌換有虧或酬價未足藉詞阻撓者有慮日後淹漫或稱逼近堡牆或稱緊靠墳廬出頭控理者職恐因此耽擱以致地凍難開遇有此等爭訟立刻馳詣該處相度地形委曲開導懲勸兼施務令衆情平服不致停工惟是渠多路遠頭緒叢雜職一人難以分身兼顧竊計事有曲直必須印官剖斷者未敢違例濫委其推諉延捱等類似不妨分遣佐雜查催趕辦但卑州只佐襍二員吏目李珍煦已

於七月內丁憂奉委職兼攝捕務安東司巡檢許霆駐扎水泉村離州城一百四十里亦各有催征職掌難資臂指之助查本年七月分選單卑州吏目雖已銓補有人到任尙遙無期可否仰懇鴻慈就分發試用佐雜內邊員暫署卑州吏目事務倘此缺已經大人咨補有人或飭卽日赴任令得協同料理尤易觀成統聽憲裁再稟者卑州桑渾二河兩岸地高水低難以引灌地畝亦經職踏勘稟明繼復念孟子論水有二激而行之可使在山大人憲檄亦有急則激取等諭意河岸自四五尺

以上自難資灌溉之利其二三尺上下者若乘奔流湍流
急之勢砌堰激行似亦可上流入地因出示招募孰識
水性素慣開渠打坦之人茲有榆次縣民李芝紹等齊
募來州稟請試驗職勸諭渾河東岸之北馬莊民趙廣
等擇河勢轉灣流急處試挑一渠已於八月底引水不到
地鄉民聚觀漸知激水之法現復有渾河西岸之柴家
莊客民宇開翰等相繼照辦亦經開就一渠惟緣秋秋涼
水落坦力緩弱勢難上送須俟明年春夏漲發坦水水洶
湧方可上灌獲利職看此情形大約桑渾二河可以
渠處尚多百姓亦輾轉傳佈爭相習學應州地土瘠薄
荒蕪滿目總視此二渠明年得有成效則沿河各村羣
起辦渠不待地方官教督自莫不鼓舞爭先行見曠土
悉成膏壤享水田之樂利者將頂感於弗諼矣

文

應州重修學記

金翰林

李仲畧

高平人

卽學爲廟以事夫子其來尚矣漢唐而下自京師達於
 州縣其所以崇奉之道愈久而愈嚴故像宇制度奠祠
 規式雖亙百世而不易者也應之爲州雖號居山閒然
 爲北道望郡且距都畿不遠非若蜀郡之陋僻其文明
 之教不接於京師者宜其校舍之宏麗廟貌之嚴飾有
 加而無替也學之興始於後唐自遼之清寧迄於天慶
 雖僅加營繕狹隘庳陋殊不稱所以奉事先聖先師之

意然有廟而無學且與古戾國朝奄有區夏垂八十年
干戈藏於府庫庠序布於寰海彝倫攸敘文教燭興大
完乙巳閒同知張侯下車未幾慨然始有修葺之意乃
揆日量地庀工度材與其傾圮易其朽腐益大而新之
且又創爲師生之位祭養之具垣墉之樸斲之工甫就
緒而侯引年去位其旣茨丹雘猶未暇也若有侯焉耳
明天子嗣位詔天下學校增弟子員置儒林官月課歲
考勵勤懲惰作養士類仍命守臣以文致身者提舉學
事節度王公以年高德邵由北京通守來領髦節真謁
之始褰徇瞻顧思有以成張侯之志於是布恩澤宣教
條理寬信善別弊扶蠹末期月而政平遂日至學舍訓
誘諸生導其未至且語其所以修飾之故一皆不及於
民捐廩入以餼工役解左駢以運僦甃夙宵一心暑雨
不懈心計口授各有程式至於藻井板幕綵繪一新堵
城累甃平直如削兩廡從祀邊豆簠簋按之禮圖靡不
完潔東廊之南別構大堂以時講肄下至庖湏莫不有
所皆前此未有也又總費幾七十萬億道之興廢繫乎
世事之顯晦存乎人惟張侯克育其始惟王公克成厥

終殆有數焉友人孟德潤昆弟同年高巖夫皆應之聞人也具道其故且命志其事若夫經畫之始已具待制敬甫之記茲不繁敘嘗聞云學者學聖人之道者也豈徒誦說其文而已哉先王之時射鄉食饗養老賓賢以至獻囚獻馘無不出於學者嗚呼去古遠矣先王之道所以得傳於後世者惟學存焉曩時垣宇蕪廢鞠爲麥牧使承學者無所庇而爲之師帥者又且恬不爲怪或齷齪細謹或耽樂宴遊至於公署頽毀而署不加葺尙奚及於學校哉今而後將見郡之後秀鼓篋而入者

弦夕誦嘯齋聖真明先王之道其緒餘土苴猶能優取科第以備朝廷百執事之選如剖荆璞而得玉入滄溟而求珠隨取隨獲而無匱者皆自二侯始故喜而爲之書

